

Ein schwebender gang/der den gang so in die tieffe fellt zerteillet A. C.
 Ein gang so in die tieffe fellt B. Ein schwebender gang/der mitt dem
 gang so in die tieffe fellt/zusammen kompt D. E. Ein gang so in die
 tieffe fellt F. Ein schwebender gang G. Seine teil so von einander
 gerissen H. I. Ein gang so in die tieffe fellt/der den schwebenden
 gang von einander reisset K.



Zu lest hatt ein gang so in die tieffe fellt/sein vrsprung/vñ endt/auß ghen vñ tieffe. Der vrsprung wirt diß teil genandt/dahâr es sein anfang bekommen hatt/das endt/in welchem es sich endet/das außghen aber/das sich an tag gibet/die tieffe aber/das sich in die erdē verbirget. Aber die Bergkleut dörffent nicht dē erste vrsprung der gängen sūchen/wie die künig zu Egypto vorzeiten/des Nil vrsprung sūchten/sonder ist ihnen gnūgsamlich/nuhr ein teill des gangs gfun den haben/vnd wie er sich auß breite/erkundiget haben: dan der vrsprung vnd das endt des gangs/mag sälten erfunden werdē. Aber an welchem teil der welt der gang außgehe/oder in die tieffe fallt/diß zeigt an/das hangendt vñnd li gendt. Es hat aber sein vestung der gang auff dem ligendē/vnd das hangendt hangt ob ihm. Derhalben so wir in den schacht farē/so ist diß teil dahin wir den bauch keren/das ligendt des gangs/vnd dahin wir den rucken wendē/das hangendt des gangs. Es vergleicht sich etlicher massen das außghen des gangs/mitt dem ligendē des gangs/vñ die tieffe dem hangendē des gāgs. Dan so das ligendt ist im mittag/so ist dz außghen des gangs gegē mittag/das hangendt aber das allweg dem ligenden entgegen ist/in mitternacht glegen. Derhalben so fellt auch die tieffe des gangs/gegē mitternacht/so der gang der in die tieffe fellet/gehengt ist. Zūgleicher weiß vrteilē wir auch von dem morgē vñ abendt/auch von den teilen/die nicht für die hauptteil gerechnet werdē/vñ deren die dar zwüschē seindt. Aber doch dieweil ein gang so in die tieffe fellt eintweders seiger gericht/oder flach fellet/oder sich stozt/so wirt das ligendt des flachē gangs leichtlich von dē hangenden vndercheiden/aber nicht also des gangs so in die tieffe

tieffe